

**Nunatsinni plastikiniq atuinerup annikillisarnissaa anguniarlugu Naalackersuisut kingusinnerpaamik UPA2020-mi suliniutissanik iliuusissatut pilersaarusiamik saqqummiussinissaannut peqquneqarnissaanik Inatsisartut aalajangiiffigisassaattut siunnersuut. Suliniutissatut pilersaarutit anguniagassartai tigussaasuussapput iliuusissanillu ilaqartinneqassallutik. Pingaarnertut suliniutissatut anguniagassat EU-mi plastikiniq atuinerup annikillisaaviginissaanut pimoorussamik suliniutaannut appasinnerussanngillat.**

(Inatsisartunut ilaasortaq Mimi Karlsen, Inuit Ataqtigiit)

### **Akissuteqaat**

(Naalackersuisut Siulittaasuut)

### **Aappassaaneerneqarnera**

Naalackersuisut Eqqissisimatitsinermut Avatangiisinullu Ataatsimiititaliaq qutsavigerusuppaat isumaliutissiisummut Mimi Karlsen, Inuit Ataqtigiit aqqutigalugu saqqummiunneqartumut, plastikimik atuinerup annikillisarnissaa anguniarlugu iliuusissatut pilersaarusiamik imalimmut. Naalackersuisut maluginiarpaat ataatsimiititaliami ilaasortat minitaqaratik isumaqtigiillutik aalajangiigassatut siunnersuut aalajangiiffigeqqullugu innersuussutigisimagaat.

Ukiut tamaasa imavissuarnut plastiki tonsinik millioninik qulinik annertussuseqartoq eqqarneqartarpoq, maannalu imavissuarni eqqakkat eqitersimasartut Afrikap nunavittarsuatut angitigilersimapput. Miserratigisinnaangilarput plastiki pinngortitamut annertuumik ajoqusiisarmat, tassami timmissaniit arfernut allaat plastikimik aqajarormioqartut siumorneqartalerput. Pinngortitami plastiki ingammik immami ajornartorsiutaavoq annertoq isummerfigisariaqagarput, tamannalu pillugu Naalackersuisut Avatangiisinut Aningaasaateqarfimmit aningaasanik suliniutinut plastikimik atuinitta annikillisarneqarnissaa siunertaralugu atorneqartussanik immikkoortitsisimavoq. Atuisutut ileqquvut annikitsunnguamilluunniit allanngorutsigit pinngortitamut pingaarutilissuarmik ilorraap tungaanut sunniuteqarsinnaavoq.

Ullutsinni plastiki sumi tamaani atugaraarput, illup iluani, qarasaasiani, biilini, poortuutissatut il.il. Puussiat plastikit taakku takussaaneerpaajullutillu tamanit atorneqarnerpaajupput. Ukiumut nunarsuarput tamakkerlugu puussiat plastikimit sanaat trillionit missaanni atorneqartarput, tassa sekundimut puussiat plastikit 31.000-it atorneqartarput. Maani Nunatsinni ukiumut puussiat plastikit millionit tallimat missaat eqqunneqartarput. Nunat ilaasa puussiat plastikiniq sanaat atorneqarnissaat inerteqqutigilersimavaat, nunallu allat ilaasa puussiat tamakku akitsuuteqartilersimavaat.

Plastikimik mingutsitsineq akiorniarlugu iliuusissatut pingaaruteqartoq tassaavoq nuna tamakkerlugu ikuallaavissanik marlunnik pilersitsinissaq, eqqaavissuarni eqqakkat annikillisarneqarsinnaaqqullugit. Plastikit pinngortitamut immamullu tingitsinnaveersaarnissaat assut pingaaruteqarpoq. Avatangiiseq peqqinnissarlu eqqarsaatigalugit naammaginartumik ikuallaanermi putsup salinneqarnissaa isumannaarneqarsinnaavoq taamaallaat ikuallaavinni angisuuni, ikuallaavinnilu annerni ikuallaanermi nukissiaq pilersinneqartoq pitsaaneruseqarpoq atorluarneqarsinnaavoq.

Taamatut oqaaseqarluta Naalackersuisunit aalajangigassatut siunnersuut taperserparput, kommuneqarfiit inuussutissarsiortut allallu suleqatigalugit plastikip atorneqarnerata annikillisarnissaa pillugu suliniutissanik iliuusissatut pilersaarusiamik pilersitseqatigissavagut. Kinguneqarluarnerusumik suliaqassaagut pineqartut tamarmik qanimut suleqatigiippata. Aaqqiissutissat nutaat pinngortitamut mingutsitsinnginnerusut pillugit avatangiisinut oqartussanik qanimut suleqateqarneq Naalackersuisunit nuannaarutigaarput.

Taamatut oqaaseqarlutik Naalackersuisut siunnersuutip Inatsisartunit suliarineqarnissaa innersuutigaat.